

Anthon Frederiksen  
Kattusseqatigiit partiiat

**§36, imm. 1 tunngavigalugu akissut, 26. September 2006. Pineqartoq: KNI-p ukioq affakaartumik naatsorsuutai**

10. oktober 2006  
J.nr. 70.63.00

Asasara Anthon Frederiksen  
Qujanaq apeqqutinnut.

Postboks 1015  
3900 Nuuk  
Oq/tel +299 34 50 00  
Fax +299 32 50 02  
govsec@gh.gl  
www.nanoq.gl

***Sapaatip akunnerata siuliani KNI Pilersuisoq 74,4 mio-inik amingartooruteqartoq tusagassiuutitigut oqaatigineqarpoq. Tamanna ilumoorpaa ?***

Ilumoorpoq suliffeqarfissuaq KNI, ingerlatseqatigiiffimmik pingaarnermik, ingerlatseqatigiiffinnillu Arctic Green Food A/S-imik, Assartuivik A/S-mik aamma Neqi A/S-imik immikkoortortalik ukioq manna ukiumi affarmi siullermi 74,4 mio. kr.-nik amigartooruteqarmat.

Taamaattorli ilumuunngilaq KNI Pilersuisoq, ingerlatseqatigiiffimmi nioqquteqarnermik immikkoortortaasoq taamaaqataanik amigartooruteqarsimammat. KNI Pilersuisoq 4,3 mio. kr.-nik amigartooruteqarpoq, tamannalu mis-singersuutitut naapertuuppoq. Pisarnertut KNI Pilersuisoq ukiumi qaammatini siullerni arfinilinni amigartooruteqartarpoq, kiffartuussat ukiup affaani kingullermi arfineq marloriarlutik aningaasarsisarmata<sup>1</sup>, tamannalu ingerlatseqatigiiffiup kaaviiartitsineranut sunniuteqartartorujussuuvoq. Ingerlatseqatigiiffik pingaarneq tamarmi ajunngitsumik ingerlatsinermi angusaqarpoq katillugit 4,3 mio. kr.-nik. KNI A/S-imi ukiup affaani amigartoorutit tamarmiusut 74,4 mio. kr.-iusut ingerlatseqatigiiffiup pingaarnernup ataani ingerlatseqatigiiffinni Arctic Green Food-imi (AGF) aamma Assartuivik-mi (ASS) naammaginangitsumik ineriartornermik pingaarnermik pissuteqarput.

---

<sup>1</sup> Decembarimi marloriarlutik aningaasarsisaramik januarimi aningaasarsiassat siumut tunniunneqarnerisigut

Ukiup affaani siullermi AGF 27,8 mio. kr.-nik amigartooruteqarpoq. Taakkunanit 6,7 mio. kr.-t ingerlatsiner mi amigartoorutaapput, kiisalu pigisanit nalikilliliissutaallutik 21,1 mio. kr.-t

AGF-imi ingerlatsiner mi amigartoorneq naammaginangitsuuvoq, tamannali ilaatigut ingerlatseqatigiiffiup nioqqutissiaasa pingaarnersaasut, nipisat suaasa, nunarsuarmi niuffaffimmi akiinik pissuteqarpoq, taakku missingersuusiordermit appasinnerusimmata, kiisalu nipisat suaasa ilaasa nioqqutigineqarnerat ukiup affaata aappaani nalinginnaasumik ukiup affaanut siullermut naleqqiullugu appariartarmat. Sulili ukioq tamakkerlugu ingerlatsiner mi amigartooruteqartooqarnissaa naatsorsuutigineqarpoq.

Pigisat nalikillilerneqarnerat marlunnik pissuteqarpoq. AGF-imit akileraarutitigut pigisat 10,1 mio. kr.-t atorneqarsinnaangillat, taakkua pisoqalereernerisigut sinneqartoortoqarnissaa naatsorsuutigineqarsinnaangimmat, kiisalu akileraarutitigut pigisat eqqortumik nalikillilerneqarnikuupput. Aammattaaq sanaartukkanik pigisanit 11 mio. kr.-nik nalillit nalikillilerneqarnikuupput, eqqortumik nalilerneqarnikummat pigisat taakku nalillit naatsorsuusiarineqartut nalinganut ernialersorinnaangimmata.

AGF-ip aaqqissugaanerani tunngaviatigut ilaatigut oqimaaqatigiissaarisoqannginneratigut sinneqartoorteqarnissaq ajornakusoorluinnartuuvoq. Namminersornerullutik Oqartussanit kiffartuussinissamut isumaqatigiissuteqarnermi akiliutit appariartortinneqarneranni taamatut oqimaaqatigiinngissutsit ersarissigaluttuinnassapput. Ingerlatseqatigiiffilli ungasinngitsukkut periusissanik pilersaarusiormavoq, tassuunakkut ingerlatsinerup pitsaanerulernissaa anguniarneqarluni, ingerlatseqatigiiffimmi oqimaaqatigiinngissutsit tamakku annikillisarneqarlutik. Naliliinera tunngavigalugu taamatut periusissatut pilersaarutit ingerlatseqatigiiffiup pitsaanagerusumik ingerlatsilernissaanut iluaqutaasussaassapput. Tunitsivinnik matusinissaq periusissatut pilersaarutini ilaangilaq, taamaakkaluartorli taamaalioratarsinnaaneq pisariaqaleratarsinnaavoq.

AGF-ip akiitsorujussuisa aamma ingerlatseqatigiiffimmi pitsaannngitsumik ineriartorerup kingunerisaanik KNI A/S amigartoorutissanut 35 mio. kr.-t immikkoortippai. Tamannali ima paasineqassanngilaq KNI A/S-ip AGF-imit pissarisani taamaatiinnarai, kisiannili KNI-mit naatsorsuutigineqarpoq aningaasat taakku qaqugumulluunniit utertinneqarsinnaangitsut, taamaattumillu inatsit tunngavigalugu annaasat maanna pisutut isigineqartariaqartut.

ASS-imi 9,2 mio. kr.-t ingerlatsinermi amigartoorutaapput, tamannalu naammaginangilaq. ASS-ip kaaviiartitani tamangajaasa Namminersorerullutik Oqartussanit kiffartuussinissamik isumaqatigiissuteqarfigineqarnermigut pissarsiarisarpai. Taamaalilluni pissutaasoq tassaavoq aningaasartuutit missingersuusianut naapertuussinnaannginnerat, ilaatigut Uummannami qaatsiartaammik ajornartorsiuteqarnikkut. ASS-imi angusap pitsaanngitsup kingunerisaanik, suliffeqarfissuup ukiumut naatsorsuutitut inatsit naapertorlugit aningaasatigut pigisami nalingat nalikillilertariaqarsimavaa.

Ilanngutissavarattaq Inatsisartut Aningaasaqarnermut Ataatsimiititaliaat KNI-mi aningaasaqarnerup ineriartornera pillugu ilisimatinneqarmat, taamani aningaasanut inatsisissatut siunnersuummut apeqquaqarnermut atatillugu.

**Tabeli: Ingerlatseqatigiiffissuup KNI-p 2006-imi ukioq affakkaartumik naatsorsuutai**

Pissutaasoq	Kingunerisai mio. kr.	Katillugit mio. kr.
<b>Neqi A/S:</b>		
Ingerlatsinermi amigartoorutit	-3,797	-3,797
<b>AGF A/S:</b>		
Ingerlatsinermi amigartoorutit	-6,722	
Akileraarutitigut pigisat nalikillilernerat	-10,083	
Sanaartukkanik pigisat nalikillilernerat	-11,000	-27,805
<b>Assartuivik A/S:</b>		
Ingerlatsinermi amigartoorutit	-9,217	-9,217
<b>Ingerlatseqatigiiffik pingaarneq:</b>		
Ingerlatsinermi sinneqartoorutit	4,300	4,300
ASS-imi aningaasat pigisat nalikillilernerat	-2,930	-2,930
AGF-imit akiitsorineqartut nalikillilernerat	-35,000	-35,000
<b>Katillugit</b>		<b>-74,43</b>

**Amingartooruqarsimappat tamanna nunaqarfinnut pilersuinermit qanoq sunniuteqassua?**

Amigartooruteqarneq nunaqarfinnik pilersuinermit kinguneqarnissaa naatsorsuutigineqanngilaq - nioqqutissanik pilersuineq, nukissiuutitut pilersuineq, assartuussineq imaluunniit ilaasunik angallassineq eqqarsaartigalugit. Immikkoortut tamarmik kiffartuussinissamut isumaqatigiissuteqarnikkut isumannaarneqarnikuupput, taamaattumillu amigartooruteqarnikkut KNI-p

kiffartuussinissamut isumaqatigiissutinik ingerlatsineranut sunniuteqarnissaa naatsorsuutigineqarnani.

Ummannap pigisaali immikkut inissisimavoq, tamatumani Assartuiviup qaatsiartaammik ajornartorsiuteqarnera pissutigalugu taassuminnga ilaasunik angallassineq isumagineqarunnaarmat. Taarsiulluguli angallassinermut Air Greenland kiffartuussinissamut Namminersornerullutik Oqartussanit isumaqatigiissuteqarfigineqarpoq.

AGF-ip Namminersornerullutik Oqartussanit nuna tamakkerlugu aalisakkerivinni 24-iusuni kiffartuussinissamut ingerlatsinermi aamma tunisinermi isumaqatigiissuteqarfigineranut atatillugu, sanioqqunneqarsinnaagunangilaq taakkua pillugit kiffartuussinerit allanngortinneqaratarsinnaanerit, ingerlatseqatigiiffiup ingerlatsinerata pitsanngortinneqarnissaanut kiisalu kiffartuussinissamut isumaqatigiissuteqarnermi akiliutigisartakkat piffissaq ungasinnerusoq eqqarsaatigalugu annikillisinneqarsinnaanissaannut. Aalajangersimasumilli maannangaq oqaaseqassalluni siusippallaarpoq, tamatumani ingerlatseqatigiiffiup aamma Namminersornerullutik Oqartussat akornanni isummersoqatigiittoqarmat.

Tamatumunnga apeqquteqarnermi Naalakkersuisut namminneq akissuteqaa-timinnut atatillugu KNI-mit akissummik pissarsiortoqarpoq, tassanngaanniillu ima akissuteqartoqarpoq:

*"Suliffeqarfissuarmi KNI-mi 2006-mi ukiup affaani siullermi amigartooruteqarneq nunaqarfinni, isorliunerusuni aamma illoqarfinni kiffartuussinerup ajorseriarneranik kinguneqassanngilaq. Nunaqarfinnili ataqatigiissaarinerup timitalersorneqarnera ingerlaannassaaq, taamaalillutillu pisariillisaanerit aamma sipaarniarit kissaatigineqartut sukumiisumik nalilersorneqarlutik. Taamatut suliat aamma atorfiit assigiiat ataatsimoortinniarlugit – kiffartuussineq ajorseriartinnikkaluarlugu - periarfissarsiornermi suliniarnermut aningaasat nukiillu naammattut illuartinneqarput. Taamaakkaluartorli sumiiffinni ataasiakkaani atorfiit ilaasa taamaatinneqarsinnaanerit pisariaqalersinnaasoq naatsorsuutigineqartariaqarpoq. Taamatut nassuiaasiarluni aamma misissueqqissaarluni sulinerup inerneru 2006-ip naalernerani naammassineqarnissaa naatsorsuutigineqarpoq, taamaasillunilu sunniutai 2007-imi ukiup affaani kingullermi aatsaat malunniutussaallutik."*

***KNI Pilersuisup siulersorneqarnera Naalakkersuisunit apeqquserneqarjaa?  
imaluunniit akisussaatitsisoqarniarjaa?***

Namminersornerullutik Oqartussat ingerlatseqatigiiffiini pisortat atorfinit-sinneqartarnerat siulersuisut suliassarivaat, Naalakkersuisullu suliassarinagu. (Takuuk Aktieselskabit pillugit inatsit). Taamaalillutik Naalakkersuisut KNI-mi imaluunniit Namminersornerullutik Oqartussat ingerlatseqatigiiffiini allani pisortat apeqquserneqanngillat.

Pissutsit pileriartornerinut akisussaasut tassaapput ingerlatseqatigiiffimmi siulersuisut. Apriiliugaa immikkut ittumik ataatsimeersuarnermi ingerlatseqatigiiffimmi siulersuisut nutaat Naalakkersuisunit toqqarneqarput, siulersuisullu taakkua ingerlatseqatigiiffimmi pitsaanerumik angusaqarnissamut tatigineqarput.

Naak siulersuisut tunngaviatigut ingerlatseqatigiiffiup ingerlanneqarneranut akisussaasuugaluartut, taamaattoq Naalakkersuisut suliffeqarfissuup ingerlatsiviisa ineriartornerannut tunngasunik arajutsinaveersaarput. Atorfilittallu qanimut suleqatigineqarput, Namminersornerullutik Oqartussat KNI-llu akornanni ajornartorsiutit arlaqartut pillugit siumut isiginninniarnermi.

Aammattaaq suliffeqarfissuup Namminersornerullutik Oqartussat iliuusissatut pilersaarutiminik ilisimatinnikuuaa, piffissami qaninnerusumi AGF-imi aamma ASS-imi ingerlatsinerup pitsanngortinniarnemani.

Ikinngutinnersumik inuulluaqqusillunga

Hans Enoksen